

KOLITI Napa 2

Polu koyoto epi'ehina fayah

¹ Poluita nani Yesu Kilisitohi aposolo nele'mo ho ti'ehinamofita to bo mone lalalutifu hiti moneka nohutoti'a Koliti hepatoga Hu'mamofifi bona'a to Giliki melugu mine'ahana'a hiti asaga'i mineme bite ete hi'ahana lenali fayah ya'ma koyo nolepito ma luto nolube.

² Afotifu Hu'ma to Sipi Boti Kilisitohi aitogati lenehe'mose'na'a to fuluna'auba ya'ma lenalitoga mino moloto mineno.

Polu gelo bise'namofifi gupisalo mino moloto minoto Hu'mamofifi fokehi li'ehina

³ Sipi Boti Yesu Kilisitohi ai afo'afifi Hu'mamofifi fokehi lilune. Ai fulunamofifi afotifu to lele'mo fulu hulata afotifu nohibe.

⁴ Ai keke'i luse'namofifi hap'a fato fato'i huto nohigo lele'mo bati hulata nohibe. Ya huto Hu'mau lele'mo bati hulata nohina yamofifi lali ana huto lalalutigihi luga'a keke'i luse'namofifi enugupisa'anilo huto nohinogomo enele'mo fulu hiluta nasana ni'ibe.

⁵ To Kilisitohi gupisa'alo keke'i luse'na samahi tito anamofifi nekisa'a mone lalitoga hulata nohibe. Ana suhi huto Kilisitohi lehe'mose'na'a ya'ma lalitoga napa huto li huto hulata nohibe.

⁶ Lalitoga keke'i luse'na huto hulata nohina ya'ma lenalitoga fuluna huto hilibe luto to lenele'mo bati hilibe luto huto hu limilata nohibe. To fuluna'a ya'ma lalitoga huto hu limilata

nohina ya'ma lenali kumu yabe luto huto hu limilata nohinagihe. To fuluna'auba lenalitoga mino moloto fi hetofa nohu lepelenogo keke'i luse'na lalitoga huto hulata nohina ana suhi huto lenalitoga huto nohinogomo fi siti bite minete lilabe luto ni'ibe.

⁷ To lali lenali kumu lifita ilata nohuta ya'ma ule'ale nohigo ma luto kehelilata nohune. Lali keke'i luse'na lilata nohuta ya'ma lenali hiti keke'i luse'na kehelite nehite fulunamofifi ketipa'a lali lilata nohutana lenali ana hite lilabe.

⁸ Lalalutigitabe, Esia metoga nohuto keke'i luse'namofifi lu gupisalo minomo ti'ehinamo ni'ibe. Ya'mu lenegekesu ho lalibe luto lilube kehelilo. Mone kegi'a ya'ma keta'a hiti nasana goli'a hiti nasanauba lugupisalo tiloto lele'mo ho kalina'a nohigo molo emitо minalupi fililupi luto mone mekeheli'ohutamo ni'ibe.

⁹ To ya'ma fililatanamofifi ka'a nolune luto komopati kotinifa gi'ehina yanauba ya hu'ehinaya mone huto hu melimi'ehinamo ni'ibe. Lali amuya'amu kehelutogo limo ito fa'menena lolo hulenogo Hu'mau filise'naguti lele'mo ho tilata bomofifi ai amuya'amu kehelutogo minalune luto ya'ma nasana huto hu limi'ehinamo ni'ibe.

¹⁰ To ai'a ya'ma filise'namu lubuto bi'ehina ya hulago yanauba minotoaku'i haka ho molo letalube'mu hibe. Ya'ma hu letoba letoba huto ya'ma ka'a keheliya ito nohuto aitoga lifita'i molo'ohune.

¹¹ To lenali Hu'mamofitoga lilana yanauba bati nohigo Hu'mamofifi ai'a komopa'a lamana huto yabe luto nolu etenogo lito lubuto bilenogo bona'a asaga'magihi enabagaguti lali kumu

Hu'mamofiji fokehi hete enegelo bite minalabe.

Polu Koliti bonatoga bilube'mu nohuto fato suhi lolo hu'ehina hapa'a

¹² Laliti'mu kehelutogo nesi'a tilata nohina. Ya'ma ya hu'ohuto'mu komopati lusiga noluto to lama'nakagu ya'ma metoga nohutogo komopatiuba nasana mone kumu li fitu falina'a meni'ibe. Lali Hu'mamofiji ka mekeheli'ahana bona'i enali enubulo ya suhi huto minoto mono ka kehelilata nehana bona'i lenali lenubulo bati huto minolata nohune. To lali metoga bona'magi kehelilata nehanalo amuya moloto bati huto mino'ohuta meni'ibe. Hu'mau lele'mago ai amuya'alo bati huto minolata nohune.

¹³⁻¹⁴ Nani kaga'ni faga faga hiti menolube. Kaga hapa lapa'a mone fala menokube. Fayahi koyoto lepielenogo'ni leka sete keheliya ilabe luto koyolata nohubo, luto akeheli'ohube. To luga'a lenali mele'isi nani hapa'ni akeheli fe li'ahana suhi hite lenali aliha'a keheli fe lite su halabe luto nokehelube. Ya hilenogo lenali kumu nani kehelugo tilata nohina ya suhi hite lenali Sipi Bo Yesuhi ya'ma kana napa'alo nani kumu kehelinogo tilibe.

¹⁵ Kaga ya luto noluna ya'ma keheliya i'ohuto lili'na kana loe yupahi lenalitoga biluna nasanauba komopatinigu bati hilibe luto le'mo babahi hu'ohuna.

¹⁶ Buto bu lenogoloto Masetonia metoga buto minoloto aku'i i behe huto oto lenalitoga nehetinogo nele'mo kohe tete kapogu molo netenogo Yutia metoga bilufihe luto keheli'ohuna yabe.

17 To nani ma luto lugo keta mehuse huto fato'mofifi hu'ehinamo yabe lite nelafihe, ya? To nani ya'ma bona'i Hu'mamofifi ka mekeheli'ahana enali tegi huto ya'ma lilube luto lu'ohuna kana'a nabaga'nitu moneko'i o'yo lilube to komopa'nigu o'e lilufihe luto lu'ohuna ya'ma futu'a lolo mehilifihe?

18 Hu'ma ai lamana'amofifi afo'afita nohigo nani kele kele pana'a nohunamofita henabe luto moneko kumu o'yo luto to o'e luto lilube?

19 Hu'mamofifi pana'a Yesu Kilisito ai hapa'a ya'ma nani hiti to Silasi to Timoti lali lu lepi'ohuta bo ai ya'ma kaga lu'ehina luga'a o'yo luto nohigo luga'a futu'a lolo huto o'e luto faga lilata meno-hibe. Asaga'i ya'ma lama'naka'a lu'ehinaloti legeya'ago ho baga ilata nohibe.

20 Hu'mau lu limi'ehina ka'a fato fato'mofifi ya'ma ai'a kago legeya'a holata nohibe. Yana'mu ya'ma Hu'mamofifi fayaha'a mino baga ito nominabe, luto Yesu yabe luto lama'naka luto Hu'mamofifi fokehi lulata nohune.

21 Hu'mamofitinifu lenali hiti Kilisitotoga lele'mo malago minoba minoba hilutamo ni'ibe. To Hu'mamofitinifu ya'ma ai'a lili'nalo lele'mo eto hu'ehinamo ni'ibe.

22 To ai'a bona'a minalune luto komopatigu keya'a molo leto'ehinamo ni'ibe. Ai aliha'a lele'mo laga hina huto mino baga ilinamofifi babeyafa'a lolo huto ya'ma ai Sikalafu'a komopatigu molo letago mino'ehinamo ni'ibe.

23 To naniya lenalitoga mebu'ohuna hapa'a ma huto ni'ibe. Nani Koliti metoga buto ka lepekiti lenele'mo sibina hu lalube luto kehelugo ke-

heli'ohuna keta nebesigo mebu'ohunamo ni'ibe. Kaga ya'ma komopa'nigu bu nogoloto nohina bo Hu'mau keheligo bati higo lu nolepube.

²⁴ To lenali keheliya ise'natinimofhi amuya melete nehabe, ya'ma keheli'ohutamo ni'inaya lenalitoga buto nani kibina bo lolo hilube luto mone melu'ohube. Fa'mene lenalitoga komopatinigu enegelo bilibe luto lenele'mo bati huto foya'a lilata nohube.

2

¹ Nani ma luto keheli'ohuna. Keke'i lilana nasana li huto hu lepi lalugihe luto kehelugo keta nebesigo lenalitoga mebilube luto komopa'nitu lu laga hu'ohube.

² Nani'ni keke'i luse nasana lepilenogo'ni mone kiyi'agi komopa'nigu le'mo bati hi netalabe? Lenalitinisigo nehabe komopatinigu keheli sibina hinogo ya suhi mehilube'mu hube.

³ To lenalitini ana'ina lilata hi'ahana le'mo fe lilabe luto fayaha nasana koyapa'i koyoto lepi'ohunamo ni'ibe. Lenali ya hilenogo nani lenalitoga bugo komopa'nigu le'mo bati hi nete'ahana aku'i komopa'nigu laga mehilina nasana lolo hi nete lalabe luto ya'ma ya hu'ohunamo ni'ibe. Laliti'mu ya'ma luto nokehelube. Nani komopa'nigu negelo bise'na kehelutita komopatinigu lenegelo bise'na li huto hu lepilibe.

⁴ To komopa'nigu keheli sibina hu'ohube, to komopa'nigu hepuhi lago lenali kumu yibi sipi huto fayahi ya'ma koyo lepi'ohuna to komopatini le'mo sibina hilube luto ni'igopa ko-

mopa'nigu lenali kumu ya'ma amuya moloto
nohubo yamofifi hapa'a lenelepile luto ya'ma
ana fayah i koyo'ohuna yabe.

*Foipafoya lilata bomofifi kolotanana'a li he'mi
etalana ka'a*

⁵ Bo mone kumu luto fayah i koyo'ohuna
ai ya'ma komopatigu laga mehina nasana
li'ehina ya'ma nanigo'i lolo mehu netabe.
Lenalitoga luga'a hiti komopa'nigu laga
mehinana li'ahanamo ni'ibe. Li nupa linogo'ni
ya'ma botoga keta hu lalibe luto asaga bona'i
hiti yamofifi lolo hu leto'ehinamo ni'ibe luto
melu'ohube.

⁶ lenali asaga'magita osahi emite ana'ina le'mo
fe lite lolo hilana ya'ma anasilo su halube'mu
hibe.

⁷ Yatai ya'ma boy a komopa'agu sibina hinogo
mono'i he'mi su ho lalibe lite foipana'a pa so etete
le'mo bati hilo.

⁸ Ya hu'ehina'mu ya'ma lenemehi emite ko
mopatinimofifi hapa'a lepile luto lenegekesa
lito lenoloka nohubo.

⁹ Nani ma luto le'mo bati hulata nasana'mu
luto yata'a fayah i koyoto lepi'ohunamo
ya'ma ka'ni kehelilafih e luto yamofifi hapa'a
huto hilabe luto fi taga hu lepoloto koyoto
lepi'ohunamo ni'ibe.

¹⁰ Lenali bo mone'mofifi foipana'a li pa so
etelago nani ana huto li pa so etolata nohubo.
Ai'a foipana'a lu huto hu'ehina ya'ma li huto hu
neto'ehina ni'igo ya'ma pa nosobe. Ya hu'ehina
lenali kumu kehelito Kilisitohi bulo ya'ma

¹¹ Satau ai fi taga hu letoto lebe ligi lalibe luto foipana he'milata nohubue. Satau ya'ma ana'ina lolo hu letalube luto kehelilata nohina'a akeheli su ho'ohune.

Polu Toloasi hepato nohuto ekesa loe lae hu'ehina ka'a

¹²⁻¹³ Nani Kilisitohi ka lamana'a lu yege halube luto Toloasi hepatoga nonehetugo Hu'mau ai'a kapo li hokolo hu netago keheliloto'ni bo mone nalalu'nifu Taitasiu ai meago yabe luto sa sa huloto'ni negekesa loe lae higo ana hepato bona'magi nayahi epito he'mi epoloto Masetonia kapoga buto sa hilube luto bu'ohuna yabe.

Kilisitohi ka'a lu huto huse'a nohune

¹⁴ Akae. Hu'mamofahi legelo bi emilune. Hu'mau ai'a Kilisitotoga lele'mo hepilago ai foipana he'mi leto'ehina'mu fokehi hoto kanipo filata nohuto'a megesa'alo lele'mo leli'ali nohina yabe. Ya higo lali noto notoga buto ka'a lu noepinogo ana kagauba hetofa tu'a tili tele huto nobina suhi huto noto noto i futili huto nobibe. Ya'mu lali Hu'mamofahi keke'i lu etoto legelo bi emilune.

¹⁵ Lali Kilisitohi tu'a lamana'a legi huto nohutita Hu'mamofahi kuguhi koyo emilago bona'i enubuto bito noenele'mana bona'i hiti to yabalugu limilata nehana bona'i hiti ya'ma tu'a enoholata nohibe.

¹⁶ Foipanamofahi nasana lolo hi'ahana enali tu nebite fililata nehana nasanamofahi tuguma'i enahago fililata nehabe. To lubuto bi'ehina bona'a lali tu nebite minolatanamofahi tu'a loholoto lele'mo mopo higo kosaba lemehitu lolo

huto minolata nohune. Foya yamofiji asaga bona'i enali'ani amuya'aniloti bati mehu'ehigo aku'i laliti ya'ma lilune.

¹⁷ Lali bona'i luga'amagi hite melete nehana'a nehana ya suhi lolo hulata menohune. Bona'i luga'a asagatoga Hu'mamofiji ka'amu kehelilago kefahi li huto hu epilina nasana lolo hulago foya'a li etelata nehanaya lali ya'ma komopati lamana hinogo minaluta Hu'mamofiji bulo buto Kilisitotoga i hepiloto mono ka'a lulata nohune.

3

*Lu mu tifise'namofiji ka'a kosaba'namofiji
foya'a lilata nohune*

¹ Lali ligiti li ho tilune luto ka'a yamofiji aku'i hapi fi'ohutamo ya'ma ni'ifihe? To bona'i luga'amagi enigi'ani li ho tilata nehana suhi huto lenalitoga fayahi melenogo bilibe luto lali hapatimofiji fayahi mone koyotolenelepilupihe? To lenali ligiti li ho tite fayahi keyenogo lito buto fato bonatoga epilupihe?

² Ya suhi huto meni'ibe. Nani foya'nimofiji fayaha'a lenali ya'ma nehabe. To fayahi koyolata nasana ya'ma komopatigu fayahi koyolago bona'i asagatoga bu gelete leka sete kehelilatana ya'ma ni'ibe.

³ Lali lenalitoga foya lilago lenali Kilisitohi fayahi koyolatana'a lolo hilago ya suhi huto hapa'a huto huto ni'ibe. To fayahi koyolata nasana ya'ma nagamitu mekoyo'ehibe. Amuya moloto minoba minoba bo Hu'mamofiji Sikalafu'uba fayahi koyo'ehina ya'ma fa'mene

lapelegusa efato meni'ibe. Komopatiniguya fayahiko yamofifi ni'ibe.

⁴ Lali ligitli ho tilune luto meni'ibe. Lali Kilisito kumu yabe luto Hu'mamofifi amuya'alo minoto ai gi'a li ho tiluta ni'ina'mu nani ya'ma nokoyobe.

⁵ Foyatimofifi legeya'a mone lalitigati huto hulata nohibe luto ya hu tegi ka luto keheliloto kehelise'nati amuya moloto mone meminabe. Ana'ina lolo hutogo bati hulata nohina ya'ma Hu'mamofitogati yamofifi ni'ibe.

⁶ Hu'mau ai'a ya'ma lele'mo bati higo lu mu tifise'namofifi ka'a kosaba'namofifi foya'a ya'ma lilata nohune. Lu laga hi'ahana ka fayahikye'ahana ya'ma keheliya ise'namofifi foya ni'igopa Sikalafu'i li emilata foya'a ni'ibe. Lu laga hi'ahana ka fayahikye'ahana yauba lemehati filise'na li huto hu limilata nohibe. To Sikalafu'uba minoba minoba huto lemehiti minolata nasana ya'ma li huto hu limilata nohibe.

⁷ To Moseu keya ka lu'ehina ka tafa komopati sibina husemofifi li huto huse nasana ya'ma lapelegusa efato fayahiko yamofifi ya nasanauba ni'igopa Hu'mamofifi fana meha'a huto hu'ehinabe. To ana keya ka lu'ehina kamofifi fana meha'a ya'ma minoto su meho'ehina Mosehi gobisalo fana mehi yanauba sipi ni'igo Isilaeli bona'magi enali analo henetite bu okaba'a silifi'auba enubu hago okaba'a bu go bati mehi'ahanamo ni'ibe.

⁸ Mono ka tafa'amofifi fana meha'a ya suhi huto mino'ehinamo ni'inaya Sikalafu'uba mono ka kosaba'i yatai li huto hu limilata nohina

yamofahi fana meha'a le'mo inomo tinogo sipi'a minalibe.

⁹ Komopati li sibina hulatamofahi lolo huse'na yamofahi lu mu tifise'namofahi ka fana meha'a ya'ma imo limito ni'ibe. To foipana meni'igo minolatana mone'a yamofahi foya'a fana meha'a ya'ma mone'a tito ni'ibe.

¹⁰ To tafa'a lu mu tifise kamofahi fana meha'a ya'ma fenene hu'ehibe. To lu mu tifise kaga kosaba'namofahi fana meha'auba napa'a huto be ligito minoba minoba hilana'mu yabe.

¹¹ Ana'ina minomo buto su halinamofahi fana meha'a ya'ma napa huka huto hu'ehinamo ni'ilinaya ana'ina mino lito buto mino foto'i molose'na yamofahi fana meha'a minomo tito sipi'a mino'ehina.

¹² Lifita ilata nohuta nasana ya suhi huto ni'inaya mono ka keta mehuse huto lu aku toto lu yege hoto epilata nohune.

¹³ Ya nohuto Mosehi suhi huto menohune. Ai Isilaeli bona'magi ya'ma fana meha'a besa besa loto mino'ehina yamofahi su halube'mu nohigo ete bu ge lalabe luto golaga bagalo gu'motu ifi to etago minolata hu'ehina. To lali Hu'mamofahi kosaba ka molo'ehinamofahi fana talina'amu fala mekiluta nohune.

¹⁴ To enali komopa'ani fi hekini lago mineme bite nehago Hu'ma lu mu tifise'namofahi kaga tafa'a yaubaaku'i ifi tago enali kaga leka sete kehelii bati mehi'ahanamo ni'ibe. To ifi tete sa gi'ahana ya'ma fa'mene mone gulu mefalina'mu yabe. Kilisito moneko'uba gulu foto li he'milata bo nohinagihe.

¹⁵ Isilaeli bona'i enali yatai kana ya'ma Mosehi

fayapofihī ka'a leka selata nehite kehelise'na'ani ifi tago menekehelibe.

¹⁶ To komopa'ani li gelehe hite Sipi Bomofitoga minenogo ai ifi tete sa gi'ahana ya'ma gulu fo epalalina'mu yabe.

¹⁷ To Sipi Bo yabe luto noluna ya'ma Sikalafu'mofi kumu nolube. To Sipi Bomofihī Sikalafu'uba minolata nohinaga ana'ina moneuba naga'i letalina'a meni'ibe.

¹⁸ Lali ya'ma logobisati aitoga ifi toto sa megi'ehinogo Sipi Bomofihī fana meha'a gapo gapo'i legitanagu bu galata suhi huto Sipi Bomofihī fana meha'a bu goto nohutogo ai fana meha'auba fi fana to letoto lele'mo gelehe higo Sipi Bomofihī suhi lolo huto nohuta yabe. Ya'ma Sipi Bomofihī Meha'a ai ya hu letalata nohibe.

4

Lugufa'la ya'ma somo kele'a ya suhi huto ni'ibe

¹ Hu'mau ai keke'i luse'namu foya'a yamofihī lu leto'ehinamo ya'ma to komopatigu keta mehina'mu kosele'i kasele'i mehone.

² Ya nohutoti foipana amuya'a hiti huto hu lalibe luto suguna huto sibi hapa'a lilata nasana lemegasa hu emiloto mone fagamofihī gupisalo minoto Hu'mamofihī ka'a li sibina hulata ya'ma ya suhi menohune. Lali Hu'mamofihī bulo ai'a ka'a lu aku toto ma'naka luto lu huto huto lu noleputogo bona'i asaga'magi lali hapati keheligo fu luto ni'ibe.

³ To ka lamana'a lu yege nohota sapuya'a lutita ya'ma enali yabalugu limilata nehana enalitogago noluna ya hulata notine.

⁴ Enali ya'ma ana metogati gihi bo moneuba gi'a Satau, ai komopa'ani fi hekini lago Kilisitotoga kehelii meemise neminabe. To ai komopa'ani fi hekini lago enali ka lamana'amofifi fana meha'auba komopa'anigu limilenogo Kilisito Hu'mamofifi babeyafalo nominana bomofifi fana meha'a bu go fe lite bu menegabe.

⁵ Lali mono ka nokehelito laliti'mu lu lepiluta'a mehune. Yesu Kilisito ai lali'i Sipi Boti to lali Yesu kumu yabe luto lenali koko panatini lolo huto minoto minalune luto lu lepilata nohune.

⁶ Hu'mau ai koyapa'i metepuhi ni'inagu fi besa lobo luto ligo go'i lu besa lo'ehina. To ai'asigo ya'ma lulago komopatigu ai'a kamofifi fana meha'auba mino kikipa hago Kilisitohi gobisalo Hu'mamofifi silikeha fayaha'a huto hu lamana nohigo bu golata nohune.

⁷ To lali ai fana meha'a komopatigu li'ohuta bona'magita fa'mene bona'i lugufa lapa mebi'ehina bona'i nohune. Ana'ina mone hetofa hatofanamofifi mina'a ti'ehina'a sa megise bati mehina kapogu malalina suhi huto fana meha'a ya'ma komopatigu limi'ehina yabe. Henabe? Ai kagamofifi amuya'a lalitoga meni'igo ai Hu'mamofitoga ni'ina yamofifi hapa'a huto hilube luto yabe.

⁸ To laliya keke'i luse'namofifi gupisalo no-hutogo yanauba lele'mo tili tele hilina'a meni'ibe. To legekesa loe kehelito negi no'ohuta yamofifi kehelutogo sibi mehu'ehibe.

⁹ Fatehati lolo nehanamagi babu lite kalana'i nemeletago Hu'mau afotifu menohe'mi letana yabe. Kalana'i mele letete ya nehanogo lagabu'i

gilago sibigopa filito fenene mehune.

¹⁰ Ana suhi huto Yesu minoto lito hu'ehinamofahi komopa'a ana huto lugufaga huto hilibe luto lugufagati Yesuhi he nefiligo mino'ehina babeyafa ya'ma lito humofa'na hulata nohune.

¹¹ To lali lubu hiti nohutogo kana'mu kana'mu bona'magi enali Yesu kumu lite lali ete neheti neheti hite lele'mo sibina sabana hite fililatanaugu lele'mo melelata nehana yamofahi Yesu minoba minoba amuya'amofahi ya'ma lali fililuta lugufaga huto hilibe luto ya suhi huto huto hu limilata nohibe.

¹² Ya hulago lalitoga fililatanauba foya'a lilata nohibe, to lenalitoga ule'ale huto nominana nasanauba foya'a lilata nohibe.

¹³ Mono bukugu fayahi ka mone ma lite keye'ahanamo ni'ibe: *Nani aitoga nemehi emilata nohuto'ni ka lulata nohube.* Ya lite keye'ahago lali ana legegeto aitoga keheli amuya mololata nohutoti ka'a lulata nohune.

¹⁴ Ya nohutoti ma luto kehelilata nohune. Hu'mau Sipi Bo Yesuhi fili'ehinagati le'mo ho ti'ehina ai suhi huto lali hiti ana huto lele'mo ho tiloto lenali hiti Yesu ai nohinalo lele'mo malalube'mu hibe.

¹⁵ Lali asaga nasana ya'ma lenali kumu yabe luto lolo huto moloto hulata nohune. Hu'mau lehe'mose'namofahi nasana i tili huto binogo bona'i asaga'magi kehelilete Hu'mamofahi foke ka lite enegelo bi emite Hu'mamofahi fana meha'auba bu baga o baga ito minalibe.

Lali keheli ule'ale huse'nagu nominone

16 Lali ya hu'ehina'mu yabe luto kosele'i kasele'i mehone. Lugufati lagabu'i gilata nohinaya kana'amu kana'amu komopatigu lele'mo amuya hulata to kosaba'i asaga yupahi limilata nohibe.

17 Metoga kalana'i mele letalana nesi'a yamofiji su halina yanauba sekele mamu'amofiji laga hina'a su mehose minoba minoba hilina'a li huto hu limilibi. Ana sekele mamu'a limilina'a yanauba lali kumu kalana'i nemalana li'ohutana be ligilina'mu yabe.

18 To ya huto ni'igo lali ana'ina keta'a hiti li limilata nehana yanauba ni'igopa ana'ina suguna nasanauba huto hu limilibi luto ana kegi'a komopatigu bu goloto minolata nohune. Ya'mana metoga ni'ina lubutu bu golata nohuta nasana yauba fa'menena lolo hilina'mu yabe. Ya'ma lubutu bu menogotanauba amuya moloto mino foto'i moloto minoba minoba huto minalina'mu yabe.

5

1 Lali ma luto kehelilata nohune. Ya'ma me lugufamo fulupa ilina nohi legitia ni'ina to tele bilenogo Hu'mau kokulumagu minoba minoba nohi mone li huto huto molo leto'ehina yamofiji bona'magi enayatu meg'i'ahana fa'mene Hu'mau ai amuya moloto minalina nohi hepa'a gi'ehinamo ni'ibe.

2 To lali ya'ma ya hu'ehina'mu kokulumagu nohi li huto huto lelepilibe luto laga'a kehel'i'ohuto amuya nomolo fa'mene lugufamo hiti minolata nohuta'mu yabe luto kiligi ito minolata nohune.

³ Lali lemehati yupa'i mino lalibe luto yamofahi kokulumagu kosaba lugufati nohi suhi huto lito li hepinogoti bati hilibe.

⁴ Lali ma metoga nonugu nohuto yanamofahi keke'i luse'na keta keta nolebesigo kiligi ito no-hune. Lali ya'ma me lugufati, nohi tafa'a legi huto ni'inana ya'ma mone'na heti he'milune luto menokehelune. Tafa'a gukete fa'mene ni'inogo kosaba gukete lito li hepito minalune ago kehelilata nohune. Ya nohuto filise'namofahi nasana lolo hu'ohuta ya'ma amuya moloto minoba minoba hilutanauba mikili halibe luto lula-ta nohune.

⁵ Ananamofahi lamana'a ya'ma huto hu lim-ilibe luto le'mo babahi hu leto'ehina ya'ma Hu'ma ai'asigo nohibe. Ai ya huto lele'mo hetofa hilina nasanamofahi babeyafa'a ya'ma ai Hu'mamofahi Sikalafu'iya molo leto'ehibe.

⁶ Lali yamofi kumu keheli eminogo komopati le'mo hetofa hu letelenogo koli mehuse mi-nalune. Ya nohutoti ya suhi huto yamofahi ke-helilune. Me lugufa hiti minolata nohuta kana'a ya'ma Sipi Bomo sa huloto kame hepato nomi-none.

⁷ Yatai kana ya'ma komopatitu Hu'mamofahi ka'amo'mu kehelutogo amuya moloto nominana ya huto ni'ibe. Legeya'a ya'ma mele'isi bu mego'ohune.

⁸ Ya nohutoti sibi komopati le'mo hetofa huto nohinogoti lugufatu kame hepato nominata-mofahi ya'ma he'mito koto hepatoga Sipi Bo hiti minolata'a yamofahi laga'a kehelilata nohune.

⁹ Minolatana yamofahi ya'ma metoga kame

lugufa hiti minolata nohuta'afi to ifoga koto hep-
atoga minaluta'afi ya'ma Sipi Bouba bu legenogo
bati hilibe luto fana hoto minoto lito hulata no-
hune.

¹⁰ Yamofi kumu ya'ma luto ma keheli'ohune.
Mega lugufa hiti nohuto ana'ina lito moloto
hu'ohuta bati huto ni'ifi to sibina huto ni'ibe
yamofiji mone kegi'a ai eto eto huto kaga
loko huto pa sose'na limilibe luto minoto lali
asagatoga Kilisitohi ka foya kefa hisalo ho tiloto
kululu tito nehetilune.

*Hu'mau lele'mo bati hulenogo ai hiti hepito
minalutamofiji ka'a*

¹¹ Sipi Bomo lelesa nolinogo nohuta ni'ibe.
Yamofiji keheli'ohutoti bona'magihi enegekesa
lito ka lamana'a keheli emilo lu epilata nohune.
Hu'mau ai hapati asaga'i bu golata nohibe. To
lenali ana suhi hite hapa'ni ya'ma komopatinitu
kehelilata nehafihe luto nokehelube.

¹² Lali ya luto linogoti keheli'ehinogo lali
ya'ma ligiti le'mo ho tilune luto lu noleputa'a
meni'ibe. Lenali fa'mene lali kumu keheli bati
hinogo netinogo lenali bona'i luga'amagihi ko-
mopa'ani topa mehanogo minete enugufamofiji
nasana'muko kehelite enigi'ani li ho tite minelata
nehana'a yamofiji nani hapa'ni lu epinogo ke-
heli bati hilabe luto nolune.

¹³ Lali kumu negi bona'i yabe lite li'ahanamo
ni'ifihe? Ya'ma Hu'mamofiji foya'amu yabe luto
ni'ibe nohune. To legekesa yigise'na bati huto
ni'ibe lite li'ahanamo ni'ifihe? Yamofiji lenali
kumu ni'ibe nohune.

¹⁴ Ya hu'ehina'mu Kilisitou ai meha'a limilata
nohinauba lele'mo hetofa higo lalitigo lugufati

lelito tiluta'a meni'ibe. Lali ya'ma luto kehel'i emilata nohune. Ai bo moneuba lali bona'i asaga kumu yabe luto fili'ehinamo ni'inagihe. To lali asaga'i ana suhi huto tafa hapatimo'mu fili'ohuta'a ya'ma kehel'i ohune.

¹⁵ To bona'i asaga kumu yabe luto fili'ehinamofahi ya hu'ehina'mu lubu hiti nohuto yamofahi lalitisigo minoto lito mehuse ai kumu luto minoto lito hilune.

¹⁶ Yamofahi lali melugu bona'magi kehelise'na mege'i mololoto hapa hapa'ani lu su meho epalalune'mu hune. To lali koyapa'i ya huto Kilisitohi ana huto gufa'amofahi hapa'a bu go'ohuta, ana babeyafalo yata'isi ya'ma aku'i mone bu megone.

¹⁷ Ya hu'ehina'mu bona'i moneuba Kilisitotoga hepiloto molo emi'ehilina ai yuhufana lolo nohilibe. Tafa hapa'a su ho etolago kosaba hapa'a ahuto hu'ehilina yabe.

¹⁸ Ana nasanamofahi legeya'a ya'ma Hu'mamofahi nasanago ni'ibe. Lali koyapa'i ai fatehe bona'a mino'ohutaya ai'a ya'ma Kilisito kumu luto lele'mo fulu hulago ai'a bona'a nominone. To ya huto lali bona'i luga'a ya'ma ana huto enele'mo fulu hilina ka'a lu epilabe luto lu limi'ehinamo ni'ibe.

¹⁹ Lu limi'ehina'mu Hu'mau ai'a Kilisitohi ho lifigo oto minoto metoga bona'i asaga'i hiti ai'a hiti enele'mo ketipa ilube'mu huto mino'ehibe. Ya huloto foipana'ani li he'mi epololoto aku'i leka so su meho'ehina yana'mu ka foya melilina'mu yabe. To lele'mo ketipa iloto kaga'a ya'ma folagahatigu molo leto'ehinamo ni'ibe.

20 Ya hu'ehina'mu lali Kilisitohi ka'a leli'ali bona'i Hu'mamofifi ka lamana'a lu lepilata no-huta keheliloto lenegekesa lito ya'ma Hu'mau lu lepilata nohina suhi huto nohune. Kilisito kumu Hu'mau lenele'mo fulu hinogo aitoga bite hepilo.

21 Kilisito ai foipana'a meni'ina bo ya'ma Hu'mau lali kumu luto lali foipanati ai gupisa'alo molo eto'ehina. Hena'mube? Ya'ma lali Kilisito hiti i hepiloto Hu'mamofifi bulo fotogo huto minalune luto yamofifi lolo hu'ehina.

6

1 Hu'mamofifi le'mo bati nehana bona'i lali lenegekesa lito ma luto lu lepilata nohune. Hu'mamofifi lehe'mose'na'a molo lepalalina buto fa'menena lolo mehino.

2 Hu'mau lu'ehina ka'a ya'ma ma huto ni'igo kehelilo:

Nani lenehe'mose kapo
hokolo hu'ohuna kanagu
lenali ka keheli'ohunamo ni'ibe.
To lenubuto bise kanalo
lenele'mo bati hu'ohunamo ni'ibe.
Ya lu'ehibe.

Kehelilo. Kana lamana'a yata'isigo ni'ibe, lub-
uto bise kana ya'ma ana huto yatai ya'ma ni'ibe.

3 Lali ana huto bona'magitoga foya lilata no-huta'mu kosele ka li lalabe luto yamofifi mono kaga behelefe limi lalabe luto ya mehu'ohune.

4 Lali Hu'mamofifi foyalo bo'a nohutagihe yamofifi hapa'a li huto huto ma luto molo lito bulata nohune. Keke'i luse'namofifi gupisa'alo nohutoti to ufeha'a hiti nasanamofifi gupisalo

minoto to i'i o'enamofifi gupilo mino'ohuta yatai ketipanamofifi komopa'agu nominone.

⁵ Segi osatu ite i kehe li keheli nehago naga nonugu mino'ohuta kalana'i melete lehalune'mu nehago minolata hu'ohutamo ni'ibe. Keke'i luse foya lito nohuto, lubu'i mekose ho tiloto nohuto nose'nati menose minomo buto nohutogo Hu'mamofifi foyalo bo'a nohutamofifi hapa'a ya'ma huto huto hulata nohibe.

⁶ Ya huto nominotaya komopati besa lago nohuto kehelise'na minoto komopati fulu higo minoto lalalutigihi noenehe'motogo Sikalafu'i hiti minoto komopati bati huto epilata nohune.

⁷ Lusiga luto ka legeya'a noluto Hu'mamofifi amuya lito minolata nohune. Lamana'a ni'igo nominoto'a nohutogo yanamofifi gimi mage'a helegu'a lolo huto lito nominone.

⁸ Ligiti le'mo ho tise'namu to lubuya huse'namofifi folagaha'agu minolata nohune. To lofokehi lilatana to libe pigi bibe hilata nehana yamofifi folaganugu nohutogo Hu'mamofifi foyalo bo'a nohutamofifi hapa'a ya huto huto hulata nohibe. Fagalo bo yabe lite neli letago faga meluse minolata nohune.

⁹ Hapati'mu sa sa nehanaya Hu'mau hapati keheli su ho'ehinabe. To fililatanalo lebato'isi ni'igo fililune'mu nohutaya fa'mene lubu hiti minolata nohune. To lahago filito bu'ohutamagita fa'menena lolo menohune.

¹⁰ To keke'i luse'namofifi gupisalo nohuto legelo biba biba huto nominone. Salafa'amofita sibigopa bona'i asagatoga mono'mofifi fe'noha'a hiti enele'mo lolo hulata nohune. Lumuhi

menina'a nohutogo komopatimofifi fe'noha'a bai toto ni'igo nominone.

11 Oho, Koliti bona'ise. Komopa'ni ya'ma lenalitoga babu luto ni'ibe. To labaguti lusiga luto lu nolepune.

12 Laliti yamofifi komopati amuya moloto lenele'mo hetofa hulata nohune. Lenali lenemehi limilata nehana yamofifi nesi'asi ni'ibe.

13 Lenali kumu kehelugo pa'ni pana'ni lolo nehago kaga'ni ya'ma lu nolepube. Mone kegil'a beleha'aga pa sete ana hite lenemeha'a nanitoga melenogo mineno.

Hu'mamofifi mono noha'a nohune

14 Hu'mamofifi ka mekehelise bona'magitoga bite mino hepite koguna lolo mehilo. Lamana'a hiti to laga mehinana hiti etali hena hite i hepite menala'ibe? Ya'ma i mehepila'ina'mu yabe. To fana mehena hiti metepuna hiti moneko kumu minala'ifiye? O'e, ya huto meni'ibe.

15 To Kilisitohi ai kala bo'a Sata hiti etali hena hite komopa'atiti hena hite le'mo hepila'ibe? Ya hila'ina meni'ibe. To Hu'mamofifi ka kehelito nominota bona'a lali hiti to ai ka'a menekeheline bona'i enali hiti hena huto koguna huto minalune? Ya huto meni'ibe.

16 To Hu'mau hiti lugefa nasana hiti moneko nonugu minala'ifiye? Ya huto meni'ibe. Nekehelihi? Hu'ma amuya moloto minoba minoba bomofifi noha'a lali ya'ma nohune. Ya hu'ehina'mu Hu'mau ma luto lu'ehinamo ni'ibe: Nani bona'nimagihi komopa'anigu minoto lito minoloto'ni enali folagaha'anigu humofa'na hilube.

To nani enali sipi bo'ani lolo huto
minalube.

To enali nani yagapana'ni lolo hite
minalabe.

¹⁷ Yamu'i Sipi Bo ai ma luto lu'ehinamo ni'ibe:
Nanitoga mekehelise neminana'a
he'mi epelete foto'i minalo.

To nani lu laga hu'ehinamofihu
bati mehina nasanalo
ya'ma li mekehelilo.

Ya hilenogo nani'ni kaba hu lepoloto
lenele'mo hetofa hilube'mu hube.

¹⁸ Ya huloto'ni afotinifita minalube,
to lenali ya'ma pa'ni pana'ni lolo hite
minalabe.

Ya'ma Hu'ma amuya bouba
huse mehuse suhi huto
ai'a kaga'a ya luto lu'ehinamo ni'ibe.

7

¹ Nemehi lepi'ohuna nalalu'nigitabe. Hu'mau
ya'ma ka lali kumu lu molo'ehina yabe. Ya'mu
lali komopati to lugufati le'mo sibina hulata
nasana asaga'i li he'milototi komopati gulu gulu
linogo Hu'mamofitoga koli'a hiti minalune.

Polu komopa'ni li gelehe hana'mu gelo bi'ehina

² Lenali komopatini lalitoga malalo. Lali lenali-
toga li sibina mehu lepolo'ohune. To bo mone'i
le'mo sibina mehu etone. To lenipagu fito
ana'inatini mone li sibina mehu'ohune.

³ Nani ka ya'ma lenifisa ilube luto lu mele-
polo'ohube. Nani koyapa'i lu lepi'ohuna ka mone
aku'i yatai lu lepilube. Lali lenali hiti moneka
minoto lito fililuta ni'ifi fa'mene minaluta ni'ifi

ana suhi huto mino lito buto minalune. Komopa'ni lenalitoga mino'ehinamo minalube'mu hibe luto alu lepi'ohunamo ni'ibe.

⁴ Lenali Hu'mamofitoga ule'ale hite nemina na komopa'ni tu keheli'ohuto lenofokehi nolube. Lenali komopa'ni le'mo fulu nehago keke'i luse'namofih i gupisalo nominoto'ni bati huto minoto negelo'ni sipi nobube.

⁵ Masetonia kapogu oto neheti'ohuta mone'a labasu mebune. Ya nohigo kalana'i melete lugufamofih i luba'a hilata to komopatimofih i lelesa luse'na yanauba luga luga huto huloto lele'mo loe lae huto mino'ohutamo ni'ibe.

⁶ Ya huto nohutogo megusa yagapanan'magihi komopa'ani le'mo bati hulata bo Hu'mau ai ya'ma Taitasi le'mo gelehe hilago oto le'mo amuya molo leto'ehina.

⁷ Ya huloto i gelehe huto o'ehinauba ya'ma anasi lele'mo bati hu'ehinamo meni'ibe. Lenali aimo le'mo bati hi'ahana ka'a ya'ma lelito ago kehelilototi komopati ketipa igo nohune. To nani'i bu nagalune lite kehelite minelata hi'ahana to foipa nasana huto hu'ehina'mu leniginaga figo mineme bite neminana to nani kumu yabe lite fi hetofa hi netete amuya melelata nehana'a ya'ma ka'ni lu nimilago yata'isi komopa'nigu keheli bati huto kehelugo tigo nohube.

⁸ Nani koyapa'i fayah i mone koyo lepito leka sete kehelite komopatin i keta hu'ehina yana'mu yatai komopa'nigu kehelugo keta mehibe. Fayahi luto koyo'ohuna kanamofih i ya'ma kana'a hupamone'isi komopatinigu keheli sibina nehago keheliloto'ni lama'naka komopa'ni keheli sibina

hu'ohunamo ni'ibe.

⁹ To yatai ya'ma komopa'ni bati nohigo nolube. Komopatini sibina hu'ehina ya'ma yamofi kumu lenipagu keta hulatanamofifi komopatini i gelehe hana'mu luto nipagu lama'naka kehelii bati nohubi. Lenali leniginaga fi'ehina ya'ma Hu'mau keheligo lamana nasana lolo hulago kehelii'ehinamo ni'ibe. Ya higo nani kaga'ni lenele'mo sibina mehu'ehibe.

¹⁰ Hu'mamofifi kamul'i liginaga filata nohinanamofifi le'mo gelehe hulata nasana li huto hinogo Hu'mau lubuto binogo minalune. Yamofifi liginaga fise nasana yamofifa'a li huto hilina aliha'a ya nasana'mu kehelinogo mone sibina mehilube'mu hibe. To mono'i mekehelise bona'i ginaga fise'na yauba negi nagi nasana li huto nohigo filite bilata nehabe.

¹¹ Bu galo. Ginaga fise'na ya'ma lapa mebi'ehibe. Yamofifi lenalitoga legeya'a nesil'a huto mehu'ehibe. Legeya'a sipi'a ahuto hu'ehibe. Hu'mamofifi kagalugu lenele'mo babahi huse'na to hapatini bati huto le'mo huto huse'na to foipa nasana fitu fose he'milata huse'na sipi'a to Hu'mamofifi ita bise'na lenelesa luse'na to nani kumu keheliya ite amuya molose'na, to foipanamofifi mone kegi'a epilata'na ya'ma nasana ya hina'a li huto hu'ehina ya'ma lenalitoga nona'a huto hulago lenali foipana memino'ehinamofifi hapa'a huto nohibe.

¹² Ya hu'ehina'mu koyapa'i fayaha nasana ma luto koyo lepi'ohuna yamofifi foipana'a lilata bomofifi ai kumu luto meni'ibe. To foipa nasana lolo huto molo eto'ehina bomofifi ai kumu hiti

luto meni'ibe. Kaga'a lu lepugo Hu'mamofifi bulo lenali lalitoga malalanamofifi hapa'a huto hilibe luto yamofi kumu koyoto lepi'ohunamo ni'ibe.

¹³ To lenali ana hilet komopati le'mo kefa i'ahanamo ni'ibe.

To komopatigo le'mo hetofa hi'ahana yamofi kumu luto meni'ibe. Lenali Taitasihi komopa'a le'mo fulu hago ai komopa'agu gelo bito nohigo anamofifi ka'a ya'ma kehelito laga'a nominone.

¹⁴ Nani koyapa'i lenele'mo hofa toto lenali kumu nofokeha kaga'ni ya'ma Taitasihi lu emi'ohunamo ni'ibe. To lenali kumu ka lu emi'ohuna yamofifi legeya'a ya'ma huto hu su ho'ehinamo ni'ibe. Nani ka'ni ya'ma faga hiti mone lu melepi'ohunamo ni'ibe. Ana huto lenigitini le'mo ho tito Taitasihi lu emi'ohunamofifi ya'ma legeya'a alolo hu'ehinamo ni'ibe.

¹⁵ Taitasiu ai lenalitoga bulago koli'a hiti kehelii emite to keke'i li etete lenipagu melete be tigilete he'me'ahana to ka'a kehelii emi'ahana yana'mu kehelito meha'a lenalitoga molo'ehina ya'ma napa ho lito bulata nohibe.

¹⁶ Nani lenali kumu keheluna ana'inatini fotogo hutogo ni'igo nugufa'ni sibina mehinogo bati huto minalube'mu hube. Ya'ma komopa'nigu bati nohigo nokehelito lu nolepube.

¹ Nalalu'nigita, Masetonia hepatoga agoya hi emise bonatoga Hu'mamofifi he'mose'nauba lamana'a lu huto hu'ehina yamofifi lu lepilube.

² Enali eniginaga fise gofana yamofifi komopa'agu minete salafa'a mine'ahanauba fa'menena lolo hinogo komopa'anigu sabiyana sipi huto lolo higo efahi li nupa hi'ahanamofifi nesi'a meni'ibe.

³ Nani enali hapa hapa'ani keheli bati huto keheli'ohuto nolube. Enali'ani enegekesa kehelite babahi hite enali efaha'ani epite amuya'anilo molo legege hite lagaso'a mone'i tite mine'ahana.

⁴ Nani enegekesa lito ya mehu'ohugo enali'ani kehelite logo'na hete Yutia kapogu Hu'mamofifi bona'amagih komopa'ani bati hinogo kehelilana nasana li huto hite enele'mo bati hilana kefahi epilane lite loka heba heba hite li'ahana.

⁵ Ya nehit ana'ina nesi'a lolo hilune'mu nelafihe, luto nokehelugo ya hi'ahana yabe. Yata'a ya'ma Sipi Bomofitoga komopa'ani keheli emilete Hu'mau lilina malalina'a hilune lite lilet lalitoga hiti komopa'ani limilete mine'ahana.

⁶ Enali ya suhi hilago Taitasiu ya'ma lenali komopatini keheli bati hilana foya hapi fi'ehina ya'ma li su hoto lilibe luto yamofifi lu eto'ohuta yabe.

⁷ To keheli ule'ale hise'natini to Hu'mamofifi ka lu yege hose'natini to mono'i hapa'a keheli fe lite kehelise'natini to mono'mofifi foya'amu amuya molose'natini to lenemehatini epite lehe'mose'natini limilata nohina ya nasanamofifi legeya'a babu luto huto hu'ehina'mu yabe luto komopatigu keheli bati

huse foya lilete kefahi li nupa hilana'mu ana hite keta mehuse hilabe luto nolube.

⁸ Nani lenogo'na bito melu'ohube. Mono ka nekehelina bona'magihi luga'aga ana foya'mu babahi hi'ahabe. Yamofihi lu lepinogo'ni lenali enehe'mose'na legege hite ya'ma huto ni'inamofihia hapa'a huto hilibe luto nolube.

⁹ Lenali Sipi Boti Yesu Kilisitohi lehe'mose'namofihia akehelilata nehanamo ni'ibe. Ai sekele mamu'amofihia afo'afu lenali kumu yabe luto muhi meni'ina bo lolo hu'ehina yamofihi lenali anatu mono'mofihia yogo fe'noho suhi hilabe luto ya suhi hu'ehinagi nani ya'ma lu nolepugo lenali giyaka lite ana hite bilabe.

¹⁰ To kaga mone ma luto keheli'ohuna lu lepinogo'ni keheliya ilenogo lamana'a huto hilibe. Lenali ya'ma tafa foya kanagu hapi fi'ahana ya'ma yatai li su halanamofihia bati hilube'mu hibe. Lenalitini yamofihi mele'isi kefahi li nupa hilune lite lilete keta mehuse hapi fi'ahanamo ni'ibe.

¹¹ Ya hu'ehina'mu molo emite lelite nebite keta mehuse hite hapi mefi'ahanamofihia suhi hite keta mehuse hite li su halana ananamofihia legeya'a ya'ma nasana mele'ehilana legege'alo li huto hilabe.

¹² Komopatinigu keheli bati hite kefa malalana ya'ma Hu'mau kehelinogo bati hilube'mu hibe. Lali memolo'ehiluta legegeto ni'igopa ana'ina molo'ohuta babeyafalo melenogoti Hu'mau bu gago bati hulata nohibe.

¹³ Enali luga'amagi lamana hite minenogo lenali sibina hite minalabe luto efahi li nupa hite epilo luto nolune meni'ibe.

14 Lenali yogo fe'nohi yatai kanagu enali salafa'a enoho lifilenogo ana'ina moneko legegetoko huto hilibe lu'ohunamo ni'ibe. To minoto kana mone yupahifi enali'ani yogo fe'nohuba lenalitoga kau'na kanagu ho lifinogo ya'ma moneko legegetoko mine melete minalabe.

15 Guna melete epiba epiba hilanamofihu ya'ma mono ka bukugu kaga'a ma huto ni'inamo ni'ibe:
 Enali nose'na babu lite
 li nupa hi'ahanamagihi enumu higo
 mone he'mi'ahana'a meni'ibe.
 To nesi'asi li nupa hi'ahana'amagi
 mone kau'namu mefil'iahanamo ni'ibe.

16 Ya'ma Taitasiu lenali kumu luto lenhe'moto fifa ilata nohuna ana legegeto aitoga huto higo Hu'mamofihu fokehi holata nohune.

17 Lali lu emutogo keheli'ehibe luto liluta'a meni'ibe. Ai'a komopa'auba bati hinogo foya lenalitoga bilube'mu hibe.

18 Taitasi hiti to lalalutifu mone hiti etoho lufuna yabe. Ana bouba ka lamana'a lu yege holata nohinogo Hu'mamofihu bona'i asaga'i kehelite gi'a liyafa nehana yabe. Ai hiti Taitasi hiti etoho lufune.

19 Hu'mamofihu bona'a enali ana bomofi kumu komopa'anigu keheli bati hilana kefahi lelito buto enele'mo bati hinogo moneka bilabe lite le'mo mele'ahana. Ana foya ya'ma Sipi Bomofihu fana meha'a le'mo sipi hilibe luto to komopati babahi higo enehe'malube'mu nohune luto foya lilata nohuta yamofihu hapa'a huto hilibe luto ya'ma komopati epise foya lilata nohune.

²⁰ Yamofahi laga mehina ka mone huto hu lalibe luto babu efahi ya'ma legeso hite kaba hila'ibe luto etoho lufugo neba'ibe.

²¹ Lali nasana lolo hutogo Sipi Boubia ai'asigo kehelinogo bati hilibe luto ni'igopa bona'magita ana hite kehelileno go foto hilibe luto lilata nohune.

²² Lali ya'ma etali hiti lalalutifu mone'i hiti enoho lufutogo foiya nebabe. Ana bo ya'ma babu yupahi fi taga hu etoto bu go'ohuna amuya nasanamofahi hapa'a huto hu'ehibe. Yatai ya'ma lenali kumu keheligo ule'ale nohuto amuya babu luto nomalabe.

²³ Taitasihi hapa'amu kehelilune lite nelinogomo lenali kumu yabe luto ai hiti nani hiti foya lilata nohu'ina botini loemo ya'ma nohu'ibe. To Taitasigi hiti moneka bila'ina bole'i lalalutigihi hapa'atiti kehelilune lite nelinogomo etali Hu'mamofahi ka nekehelina bona'atitimagi etoho lifigo foiya neba'ibe. To etali Kilisitohi fana meha'a le'mo saga hilata neha'ina bomale'i neha'ibe.

²⁴ Lali lenali'i lenele'mo napa huto noluna yamofahi lamana'a huto hilibe lite lenali ana bona'i lenemehi epinogo Hu'mamofahi bona'magihi li gehesa'alo li gehesa'alo lenali keheliya ilabe.

9

*Yutia hepatoga mono bona'magi kumu efahi li
nupa hi'ahanamofahi ka'a*

¹ Yutia kapogu Hu'mamofahi bona'a
enehe'mete efahi epilanamofahi ka'a

akeheli'ahabe. Yamofahi henabe luto aku'i koyo lepilube?

² Ana foya'mu komopatini topa nohago keheliloto lenigitini li ho tito lenali hapatini'mu Masetonia bonatoga ma luto lu epi'ohube: Hu'mamofahi agoya hu emise bona'i Akaiya hepatoga nehanamagi tafa kufugu mele'isi le'mo bati hilet kefahi huto hulata nohina kapo'a li huto hi'ahanamofahi ka'a ya'ma Masetonia bona'i lu noepugo bona'i luga'amagi enali amuya melete katini kehelilete ana foya'mu enipagu keta mehuse hu'ehina.

³ Nani ana foya'mu lenigitini li ho tito lu lepi'ohuna kagauba buto fa'mene lo lalibe luto lu'ohunalo ya'ma anamoloko melete keta mehuse hilabe luto nigibo nagabo ya'ma enoho lufugo nebabe.

⁴ Nani'ni alih'a' nohunamofahi Masetonia bona'i hiti buto lenali kefahi li nupa huse'namu ligitagahi nehagolenele'mo bati huto lu lepi'ohuna ka'ni limi lalibe luto nani hiti to lenali hiti lubuyati hu lalibe luto yabe.

⁵ Yamofahi ya'ma nani'ni nokehelugo bati higo nalalu'nigita ya'ma enogo'na hoto enoho lufugo kohe tete lenalitoga foiya nebabe. Bi nehetinogo lenali kefahi epilune lite ema afe-toga ka'a nimi'ahanamo ni'ibe. Yamofahi yata'a kanagu li nupa hinogo minalibe. Ya hilenogo nani lenalitoga bu nehetito lenohoka lenohoka hinogo'ni kefahi malalana'a huto ni'igopa komopatini li hokolo hite minete kefahi melelata hi'ahanamofahi hapa'amo lama'naka huto hilibe.

⁶ To kefahi li nupa hilana'mu fono ka ya'ma ya

luto noluna keheli'ehilo. Lenali bigaha'a nesi'a ho kafaluta ya'ma minoto legeya'a nesi'asigo lilune'mu hune. To bihi nasana asaga bihina lolo hiluta yamofahi minoto samahi tito lilune'mu hune.

⁷ Ya hu'ehina'mu ya'ma suhi lilabe. Lenali fato fato komopatinitu kehelite keheliya ite kehelilana legegeto hite ya'ma kefahi he'milabe. To enipakafa hiti nehinogo bona'magi enohoka enohoka hinogo ya mehuse komopatinigu babahi hite he'milabe. Enegelo bite kefahi he'milata nehana bona'magihi Hu'mau bu gago laga'a besilata nohinagihe.

⁸ Hu'ma ai amuya bo hapa'a nohina bo keta mehuse huto ana'ina ai amuya'a huto hu lepilebe. Ya hulenogo lenalitini lenumu'i nehinogo lenehe'mose foya fato fato bona'mofahi lilune litemo ana'ina'mu sa mehilana'mu yabe.

⁹ Mono bukugu ka fayahi mono bona'magi kumu mone ma luto ni'inamo ni'ibe:
Ai'a ana'ina'a guna ito salafa'amagihi
enehe'moto epilata nohibe.
Ai'a keke'i lu epolose'na'a i laga mehuse
mino lito buto minalube'mu hibe.

¹⁰ Hu'mamofahi ai'a biha'a nasana li huto hu limigo hekolo'ohuta anamofahi legeya'a silaga'i huto higo lito minoto ho tito nohune. Ai'a lenali hiti minoto bigaha'a li huto hu lepi su holoto lusa gito le'mo napa hulenogo enehe'mose'natinini yamofahi legeya'a mino bai toloto i futili huto minalube'mu hibe.

¹¹ To amuya fe'nohatini hiti lolo hite bona'i enehe'mete fato fato bona'i hiti enele'mo bati hilenogo enehe'mose'natinini legeya'a huto

hilenogo enali lali kumu yabe lite Hu'mamofifi fokehi lilana'mu yabe.

¹² Lenali ya hite, Hu'mamofifi naga'a enehe'me'ahanauba legeya'a huto hu'ehina mone ana muhi menina bona'i enele'mo bati hu'ehina to mone hiti Hu'mamofifi enegelo bite babu lite neminana ni'ibe.

¹³ Lenali Kilisitohi ka lamana'a kehelilete li pili kete lite neminana yamofifi hapa'a to lenali Yelusale hepatoga mono ka keheli'ahana bona'i to lenalalutigihi luga'a asaga'i enali hiti lenipagu bati hinogo kehelite babu lite enehe'melata nehanamofifi hapa'a huto hilenogo Hu'mamofifi fayahi mino baga ito minalibe lite le'mo ho tilune'mu habe.

¹⁴ Ya hilenogo Hu'mamofifi lehe'mose'na'a fato suhi huto lenalitoga li huto nohina'mu yabe lite komopa'ani lenalitoga melete lenali kumu yabe lite Hu'mamofitoga buka tilune'mu habe.

¹⁵ To lali Hu'mamofifi ai'a lehe'moto fi hetofa hu let'o'ehinamofifi afo'afih Yesu kumu yabe luto lu su meholatamofifi ya'ma fa'mene iyo iyo ka lu etoto fokehi lilune.

10

Polu ai'a foya'a le'mo amuya molo'ehina

¹ Poluita nani ya'ma Kilisitohi fuluna'a hiti lehe'mose nasana'a hiti kumu luto lenegekesa lito lu lepilugi kehelilo. Kehelite nani kumu ya'ma lite lilata nehabe. Lalitoga oto minoto ai'a amuya'a hiti bo menohinaya kaga'a nagami'a hiti lu lepilata hu'ehina. Ya huloto buto minoto

golagaguti kaga lu lepilata nohibe. Lenali ya nelabe.

² Nigibo nalalu'nigita, lenalitoga buto minoto melugu bona'magihi komopa'anitu kehelite lilata nehanamofahi suhi huto foya'a lito nominabe lite nani kumu lilata nehana bona'i nogolagaguti kaga lu epilube luto lilunamofahi babahi huto lipoti lu epilunamoya lenali luga'amagita ana suhi huto nogolagaguti lu lepi lalugi nohoka mehilo.

³ Lali fa'mene bona'i ma metoga minoto humofa'na hu'ohutamo ni'inaya Hu'mamofahi kaga kumu yabe luto luba hulata nohuta yamofahi metoga bona'magihi tafa komopa'anitu kenasabo bilata nehana ya huto meni'ibe.

⁴ Mono kamofahi luba'agu foya lilata nohutamofahi metogati gimi mage'i huto nohuto meni'ibe. Ya'ma Hu'mamofahi amuya'a hiti nohuto yanatu fatehe bona'magihi fa'mene kaga'animofahi bihu gegisa'a tele bilata nohune. To enali amuya moloto li pigi binogo ni'igo,

⁵ Hu'mamofahi hapa'a keheliya ise'namofahi kapo'a hekini lalune'mu ana'ina lite enita bise kaga'ani li nohe'mune. To Kilisitohi agoya hu emiluta'asigo huto hilibe luto kehelito fato fato'mofahi naga'i emitio nohune.

⁶ Lenali nani ka'ni keheli fe nelanamofahi ya'ma babahi huse helenogo bona'a luga'a ka pelesa ilata nehanamagihi osahi enahalune luto enegeba huto nohune.

⁷ Nani hapa'ni lenogobisalo huto nohinamofahi legeya'a bu galo. Lenalitogati bo moneubafi moneuba ai'amu kehelito Kilisitohi yagapan'a

lolo hilinauba ai'amu ma luto kehelibe. Ai moneko'i Kilisitohi bona'a menohibe. Lali hiti ana huto asaga Kilisitohi yagapanago nohune.

⁸ Sipi Bomofhi foya'amu kehelito amuya'a limilata nohinamofhi lenele'mo laba husemofhi ni'igopa lenele'mo lukes fi lepalalube luto ni'inaya nani ana amuya'amu luto nugufa lelito tito kaga lu lepilunamofhi nubuya mehilina'mu yabe.

⁹ To fayaha nasana yama koyoto nolepuna yamofi kumu lenelesa lusemofhi ka'a koyoto nolepuna'mu ya'ma lengekesa mekehelilo.

¹⁰ Nani kumu ya'ma lite lilata nehabe: Fayaha nasana'mu kaga'a koli'a hiti to amuya'a hiti koyolata nohinaya logobisalo ya'ma amuya bo menohibe. To futu'a kaga lulata nohinamofhi ya'ma nagami'a hiti lulata nohipe lite lilata nehabe.

¹¹ Bona'i ya hi'ahana'amagi enali ma lite kehelilabe: Nani foto'i nohuto ka fayahi koyoto lepilata nohuta ananamofhi legeya'a moneko legegeto folagahatinigu nohuto li huto huto melenogo'ni bu galube'mu hube.

¹² Bona'i enugufa lelite titi hite neminana bona'i enalitoga lali i hepito legege hilune luto enali suhi huto nohune luto nolupiye? O'e. Bona'i ya hi'ahana'a enali hapa'ani ka keheli melete sibigopa ka lilata nehabe. Enali engekesa'anilo kehelite ai bu gago ai bu gago hite hapa'ani li gehe nelibe.

¹³ To laliya Hu'mau melimi'ehina foya sokapo kumu lugufati li ho tiluta meni'ibe. Ai'a limi'ehina foya sokapo hiti lili'na hiti ya'ma'asigo liluta ni'ibe. To ana amuya'a hiti lili'na'a

hiti limi'ehinana mone lenalitoga liluta luto lu limi'ehina yabe.

¹⁴ Lali foya'amofahi legegeto huto lulata no-hune. Foyamofahi kupa'alo yamofahi lama'naka lenalitoga ni'inamo ni'inaya yabe. Hiya hutobe? Lali kohe toto ya'ma lenalitoga nehetito lali labagaguti Kilisitohi ka lamana'a yata'a hapi hite kehel'i'ahanamo ni'ibe.

¹⁵ Lali bona'i luga'amagihi enali foyagu laga'a kehel'i'ahana suhi huto moloto lali li'ohutamo ni'ibe luto lugufa lelito tise kaga lulata mone mehune. Keheli ule'ale huse'natin yamofito yahi lileno go lali lenalitoga buto foyamofahi kupa'a Hu'mau molo leto'ehina'a ya'ma le'mo hofa talune luto ya'mu komopatigu lebesi'ehinamo ni'igo kehelito nominone.

¹⁶ Ya hulototi lenemege saga ni'ina hepatoga bona'magihi enalitoga ka lamana'a lu huto huto lu epiloto bo mone'mofahi foya kupa'agu lali'i li huto hu'ohutamofahi lugufa lelito tilatanamofahi kaga luse'a mone lu meemilune.

¹⁷ Mono bukugu kaga mone ma luto ni'inamo ni'ibe: *Moneuba lelito titi huto kaga lilube'mu nohina bouba ai Sipi Bouba li huto hu'ehina'mu kehel'i emito Sipi Bomofahi gi'a liyafa huse ka lilibe.*

¹⁸ Moneuba ai'a gufa'a lelito tito nolinogomo ya'ma fa'menena lolo nohibe. Sipi Bouba ana bomofahi gi'a le'mo ho tigo lamana'a lolo hu'ehibe luto lilune.

11

Polu to faga aposolo bona'magi

¹ Kaga nesi'a mone lu nolepinogo'ni negi ka lolo nohinogo kosele kasele'i meleneheno. Fa'mene ya'ma legeso hite kehelilo.

² Nani lenali kumu yabe luto Hu'mau siko hulata nohina'mu yabe luto amuya mololata no-hube. Lenali bo alobo suhi meko'ehina pa'i bala bulu tigo mino'ehina ana legi hite nehitē bo monekomofito bilabe luto nani keya'i molo lepolo'ohuna ya'ma Kilisito nohibe.

³ Yamofahi ya'ma osifa'uba mi'i mololata nohinamofahi hapa'a kehelili fe lite minete Ebahi ya'ma faga kagaloti mi'i molo eto'ehina, ana kagaloti lenalitoga bona'i luga'amagi enim'i'i molo lepalalana'mu kehelilata nehana golo golo gilenogo babahi Kilisito kumuko kehelilata nehanamofahi he'mi lalabe luto nekehelugo keta nohigo nolube.

⁴ Lenalitoga bona'i moneuba henetito Yesuhi hapa'a lali lu lepilata nohutamo ya suhi huto ni'igopa meha'a fato fato'mofahi mone lu lepi'ehinamofahi to koyapa'i lalitogati li'ehinamo ni'igopa fato fato'mofahi kosaba kaga lu lepi'ehinamo ya'ma to ka lamana'a lalitogati kehel'i'ahanamo ni'igopa mono ka fato fato'mofahi lu nolepigo o'e lite melise fa'mene kehelii emilata nehanamofahi bati huto ni'ifihe? O'e, yana'mu komopa'nigu keta nohigo nolube.

⁵ Nani'nimu kehelugo nanitoga ana'ina ya suhi ma suhi sa sa huloto aposolomagihi bo sipi enonogo melete enigigusa'aluga nominona legitia lolo mehibe.

⁶ Nani nabagaguti kaga lu lepilata nohuna nesi'a amuya memolo'ohunamo ni'inaya to Hu'mamofahi ka hapa'a kehelii bati hu'ohuna

yabe. To yamofiji hapa'a fato fato suhi huto lu hokolo huto lenubulo li moloto lu lepilata nohune.

⁷ To lenali lenele'mo hofa talube luto nani'ni imo limito minoto Hu'mamofiji ka lamana'a lu lepi'ohunalo mina'a mone liluna'a mehu'ohuna yamofiji sibina hu'ehifi bati hu'ehibe?

⁸ Lenalitoga mono foya nolito lenehe'malube'mu nohube luto to Hu'mamofiji naga'i luga'agati yogo fe'nohi lilata hu'ohuta ya'ma enali nasana'ani gumina lise suhi huto lolo hu'ohuna ni'ifihé?

⁹ To lenalitoga nohuto ana'ina mone kumu sa huto buto mone lu melepi'ohunamo ni'ibe. Nani'ni sa sa huto humofa'na nohugo Masetonia hepatogati nalalu'nigi nehetite ana'ina nimite li nabaga melelata hi'ahana. To lenalitoga ya'ma fa'mene nohuto keta'a hiti nasana mone ligo mefi lepolo'ohunamo ni'ibe. To mino lito tito aku'i ligo mefi lepalalube luto nolube.

¹⁰ Kilisitohi ka lamana'a komopa'nigu ni'igo lama'naka nolube. Ana suhi hulata nohuna nugufa le'mo napa huto hu tegi huto noluna kapo henana'mu Akaiya kapotiniguti mone fi hekini melalana'mu yabe.

¹¹ Ya'ma yamofiji hena'mu nolube? Komopa'ni melepise ya hulata nohufihe, ya suhi huto meni'ibe. Komopa'ni lepi'ohunamofiji Hu'mau moneko bu go'ehibe.

¹² Lenalitogati mina'a melito aku'i kohe toto nasana lilata nohuta ya suhi huto minalube'mu hube. To yamofiji fa'mene'mu ni'igopa bona'i luga'amagihi Polu foya lilina yamofiji

babeyafalo minalune lite lilata nehana enugufa lelite ti lalabe luto yamofifi lukesa'ani li sigilata nohune.

¹³ Bona'i ya hana'amagihi aposolo faga fagamofifi to mono ka foyamofifi faga faga'a lite minete, Kilisitohi aposolo'a lali'i babeyafa'a lolo hilata nehabe.

¹⁴ Ya nehite yamofifi nasana'a fato fato'mofifi mone li'ahabe luto lilupihe? Ya luto meni'ibe. Satau ai hiti ya'ma agelo bona'a fi fana tete enali babeyafa'a lolo hulata nohibe.

¹⁵ To Satahi foya'a lilata nehana bona'i enali ana hite lamana'amofifi kele kele'i hi emilata hi'ahana babeyafalo enali'ani babahi hite lolo hite minete nehago topa mehalune. Enali minete sibi foya'a lilata nehana yamofifi mone legeya'a lilune'mu habe.

Polu aposolo foya lito gabu'i gi'ehinamofifi ka'a

¹⁶ Kaga lu'ohunamo aku'i lilube. Nani kumu negi bo lolo nohibe lite kehelite mehilo. Sibi yamofifi nani kumu ma lite nekehelitemo kehelii nimilenogo nugufa nesi'a le'mo napa huka huto lilube.

¹⁷ Nani kaga ma luto liluna ya'ma Sipi Bouba lu'ehina supo huto lilugopa fa'mene nugufa lelito tito ka'a hapi fi'ohube luto sibigopa negi kaga lilube'mu hube.

¹⁸ Bona'i silaga'magita lugufamofifi nasana'mu le'mo napa hite kaga lilata nehanagihe, nani ana huto fa'mene babeyafa huto lilube.

¹⁹ Akae. Lenali ana'inamofifi lenali ana'ina hapa'amu kehelilata nohuta bona'i nohune lite

li'ahanamo ni'inaya luga'amagi negi nagi ka lenelepilago keta mehuse hite keheli'ahanamo nehabe.

²⁰ To koko yagapanatini lenele'mo malalune'mu nehite, to nose'natini lenebesilit nalune'mu nehite, to fi taga hi lepelete nehite, to enighiti bo lolo hi lepalalune'mu nehite, to lenogolaga lenabaga i gofa halune'mu nehinogo yana'mu lenali kele'na ka meepekise keheli epilata nehabe.

²¹ Lali ya'ma ananamofahi suhi amuya memo-lotogo lenali koli nehabe lite nelafihe? Lali lenalitoga agoya huto mino'ohune. Yana'mu lubuyati hilifihe ya?

Mone'amagi ana'ina ya suhi ma suhi hite haha luloto ya'ma li'ohune lite nehinogo nani hiti negi bona'magihi suhi huto nelesa melinogo lilunagihe.

²² Enali'ani'mu Yuta bo nohune lite lilata nelago, nani hiti ana huto Yuta bomo nohubue. Enali'ani'mu Isilaeli bona'i Hu'mau lele'mo ho ti'ehina'a nohune lite lilata nelago, nani ana huto lulata nohubue. Enali aku'i ana hite enali'ani'mu Abalahahi tata'agita nohune lite lilata nehago nani analo enemege'i moloto lulata nohubue.

²³ Enali'ani Kilisitohi kele kele bo'a nohune lite nelago nani ya'ma sibigopa negi nagi ka lilube. Nani enebe ligito Kilisitohi koko bo'a fato fato'mofahi nohubue. Nani foyamofahi keke'i luse nohuna ya'ma fato fato suhi huto ni'ibe. To mono ka'mu luto naga nonugu tilata nohuna to segi osatu nehelago nagabu'i gilata hu'ehina. Babu yupahi nani filise'na hu'ohunamofahi fato fato legegeto tito ni'ibe.

24 Yuta bona'i enali kana nayahi mone kegi'a su hago osatu nehe'ahana 39 higo nehe'ahabe.

25 Kana loebe monebe Lomu bona'magi segihi osatu nehe'ahanamo ni'ibe. Kana moneko yupahi efa osatu nehelago filise'na hu'ohunamo ni'ibe. To kana loebe monebe higo boti ya'ma li gofa higo nagamilugu limise'na hu'ohunamo ni'ibe. To kana moneko yupahi nagamilugu hege nagami'i gupisalo minoba minoba nohugo ikahi tiloto limilago, yege tiloto limilago hu'ehina yabe.

26 To kana babu luto yatama kapo buba buba humofa'na huto nohugo ko'uba nagami'uba hago filise suhi huto mino'ohuna yanamofifi gupisalo tito mino'ohunamo ni'ibe. To lubalo gumina bona'magi kofohi nemalago buto kapo molo'ohunamo ni'ibe. Yuta bona'i nani hepato bona'magi to fegutoga bona'magi nohose'na hite nehago folagaha'anigu mino baga ito mino'ohunamo ni'ibe. Sipi hepatoga buto bona'magi li gehesa hite nahalune'mu nehago mino baga ito mino'ohunamo ni'ibe. To fa'mene ka me'i ni'ina metoga hiti foya yupa kopa humofa'na huto filise'na huto mino'ohunamo ni'ibe. Hege nagamilugu ya'ma folose supofifi legegeto to mono ka faga hiti lilata nehana bona'nimagihi folagaha'anigu mino baga ito bula ola nohunamo ni'ibe.

27 Hitupa foya lito nugufa nagabu'i gigo humofa'na huto nubu'i ko bati mehuse humofa'na huto kau'namu filito yafi nagami kumu nebesigo yasi'mu filito mino'ohunamo ni'ibe. Gukete'mu to nebelusa'mu sa sa huto mino'ohunamo ni'ibe.

28 To yanamofiko mone meni'ibe. Kana'amu

kana'amu komopa'nigu nagabu gigo nogo noto hepatoga buto Sipi Bomofiji bona'magihi asaga'i kaba hu epololata foya'mu kehelugo keta nebe-sigo minolata nohube.

²⁹ Luga'amagi Hu'mamofiji kagu amuya memalago nani keke'i lu epoloto nohube. To luga'amagi enali Hu'mamofiji kagu ho kete limi'ahanamagihi komopa'anigu keta nohigo kehelito nominobe.

³⁰ To nani nasana mono kumu nugufa le'mo hofa talube luto noluto'nimo amuya memolo'ohuna yana'mugopa le'mo napa huto linogo'ni bati hilube'mu hibe.

³¹ Sipi Bo Yesuhi afo'afu Hu'ma ai'a ya'ma nani kumu bati huto nokehelibe lama'naka luto'nimofiji keheli'ehibe. Ai gi'a li saga huto fokehi luba luba hulata hiluna'mu yabe.

³² Nani Tamasiko hepatoga nohugo gihti bo Aletasi gamaniuba naga nonugu nele'mo malalube'mu nohuto lito nohi hepato gegisa'amofiji kasinugu kofohi mele'ahana.

³³ Ya nehago nigibo nalalu'nigi enali sipi sepekele'nagu li gu ileté bihu gegisa hokolo hu'ehinaguti fitu fe he'migo leke ho limito fegutoga folo'ohuna yabe.

12

Polu komopa'amofiji bamu'i ego'ehina ka'a

¹ Nugufa le'mo hofa taluta ka'a kosaba'i yamofi mone le'mo bati mehilinaya fa'mene yamofiji lilube. Komopa'ni li gelehe higo ana'ina bamu'i

bu go'ohuta to Sipi Bouba lu belegepa ito lu'ehina yamofifi yata'isi beto huto lenelepilugi kehelilo.

² Nani Kilisitohi bona'a mone'i keheli'ohube. Nani ya'ma nasana mone bu go'ohuna kana'a kufu 14 nobigo bo mone ai'a ya'ma Sipi Bouba fa'mene le'moto tito kokulumma ifo muya gupisalo ni'inagu ya'ma ti'ehina. Nani gufa'a hiti ni'ifi to gufa'a gololo tilago ni'ifi luto ya'ma keheli bati mehube. Hu'mau ai'a ya'ma keheli'ehibe.

³⁻⁴ To ana bo ai Sipi Bouba fa'mene le'moto tito ya'ma Palatisi gi nohota foyagu tito ka'a lu bagaguti meluse to metoga bona'magita lu huto mehilabe luto ya'ma keheli'ehina. Nani ana bo ya'ma keheli'ohube. To gufa'a hiti ni'igo ti'ehifi to gololo tiloto kokulumagu ti'ehifi yamofifi nani mekehel'i'ohube. Hu'mau aigo keheli'ehibe.

⁵ Ana bomofi kumu luto gi'a le'mo hofa toto lilube luto ya'ma nani'ni hapa'ni le'mo hetofa huto melilube'mu hube. Nani'nimu lilube luto yamofifi lapa mebi'ohuna yamofi kumu ya'ma lu hetofa huto liluna'mu yabe.

⁶ Nugufa le'mo hofa taluna ka'a lilube luto lutita lama'naka luto lutitamo ni'inaya negi nagi bo meminotita'mu yabe. Ya hu'ehinaya, nani kumu kehelinogo ti lalibe luto yamofifi mone melilube'mu lube. Ana'ina'mu lugo to lolo huto moloto nohugo lenalitini bu gete akehelilata nehana ana legegeto huto minalina'mu yabe.

⁷ Sipi Bomofitogati ana'ina kosaba'i bu goto moloto hu'ohunamofitoga komopa'ni ti lalibe luto nugufa meme'agu ema ufeha'a hiti nasana monetu fi'ehinamofifi Satahi kele kele pana'a moneuba ai komopa'nitu kehelinogo ti lalibe luto

nayaha'ni nalapihe luto lu'ehinamo ni'ibe.

⁸ Ya hinogo he'mi neto lalibe luto Sipi Bomofitoga kana loebe monebe yupahi loka ho'ohunamo ni'ibe.

⁹ Buka tugo ka'a ma luto lu nimi'ehina: Nani felisa'niuba kai amuya memalalata'mu yamofiji babu luto kimito kele'mo bati hulata no-hibe. Nani kehe'mose nani'niuba kaitoga i bilito buto ni'inogo ana'ina mone kumu buka tilata'a meni'ibe luto lu nimi'ehina. Ya hu'ehina'mu Kilisitohi amuya'auba nani'i nele'mo amuya malalibe luto lapa mebi'ohuna yana'muko le'mo hofa toto noluto'ni negelo'ni bilata nohunagihe.

¹⁰ To Kilisito kumu yabe luto amuya memalaluna ni'ifihe? To nele'mobe hokobe hi netalana ni'ifihe? Keke'i luse'namofiji gupisalo minaluna ni'ifihe? To bauna fise'na to kalana'i melese'namofiji gupisalo minalunamo ni'ifihe? O'yo. Fa'mene yana'mu komopa'nigu kehelisibina mehu'ohube. Nani lapa mebi'ohunalo ya'ma ai'a amuya'a nimilago amuya mololata nohunagihe.

Polu Koliti bona'i keke'i lu epolo'ehina

¹¹ Ya'ma nani kumu lulata nohuna ka negi nagi ka lu'ohunamofiji lenali kehelite melete hi'ahana yanauba nele'mo topa nohago nolube. Lenalitini nele'mo hofa tenogo bati hilinagi. Nani fayahiafo'afita fa'mene bo nohunaya enali enegekesa sipi bo nohune lite kehel'i'ahana lenalitoga bite nehana'amagi nebe meligi'ahana yabe.

¹² Nani lenalitoga foya bati huto lugo topa hose suhi to ana'ina kosaba'i bu go bati huse nasana kosele'i meho'ehina'a hiti huto hulata nohina

yanauba aposolo bomofhi hapa'ni li huto hulata hu'ehina.

¹³ To lenali henana'mufi sa sa hilet Hu'mamofhi naga'amagihi li gehesa luga'a lenali babeyafalo menilibe. Nani lenalitoga moneko nasana huto mehu'ohunana ni'ibe. Nose'natini to ana'inatini lenebesilito kalana'i memolo lepolo'ohunamo ni'ibe. Ya huloto lenele'mo sibina luse'na yamofhi lenali keheli sibina hite hi'ehilanamo yana'mu foipana'ni he'milo luto lenoloka halufihe, ya?

¹⁴ Nani lenalitoga loe yupahi bu'ohunamo ni'ibe. To yatai ya'ma aku'i bilube luto le'mo bati nohube. Binogo'ni kohe toto buto nug-ufamofhi nose'na'a hiti fe'noha'a hiti efaha'a hiti mone lenoloka mehaluna'mu yabe. Lenali yogo fe'nohatini'mu ni'igopa lenali kumu yabe luto amuya mololata nohube. Yagapanai'i kitili'amagi ito'anigi afo'anigi enele'mo nupa hilana'a mehabe. Enali ito'anigi afo'anigi lelite tite nose'na enabagagu bilana'amuko keheli bati hite minelata nehabe. Nani afotinifihi suhi huto nohuto ya'ma lu nolepube.

¹⁵ Ya suhi huto nani lenali kumu yabe luto yogo fe'noha'ni minoto lito hulata nasana'ni li he'milube luto keta mehuse huto nohube. To nani ya huto komopa'ni lenelepilata nohunogo lenali komopatinitu nani kumu lenemehi mele-lata nehanamofhi inomo limito minalifihe?

¹⁶ Bona'i luga'amagi nani kumu ya'ma lite lilata nehabe: Ai'a nasana'a li be sililata'a mone menilinaya ai suguna'i huto bona'magihi fi taga hu letoloto limi'i mololoto ana'inatini be sili'ehilina ni'ifihe lilata nehabe.

17 To nani hiya huto ya hu'ohuna ni'ibe? Lu nimilo. Nani yagapana naga'ni lenalitoga enoho lufugo bite ana'ina mone bite li'ahafihe? O'e.

18 Taitasi ya'ma bilifihe luto lu eto'ohuna to lalalutifu mone ho lufugo moneka bi'aha'igo yamofihu Taitasiu buto lenalitogati ana'ina mone lenebesili'ehifihe? O'e, le'ali komopati'a li hepi-loto kapo monekolugu ito moneka nobu'ibe.

19 Kaga oto lulata nohuna yamofihu lenali ke-heligo ka'ni ya'ma lenele'mo hetofa huse kaga noluna lolo nohifihe? Ya suhi meni'ibe. Nani Kil-isito hiti nohuto'ni Hu'mamofihu bulo kaga lulata nohube. To nigibo nalalu'nigita, lamana'a nani kumu yabe luto melube. Mono kagu lenele'mo hetofa hilube luto lulata nohube.

20 Nani lenalitoga buto bu lenagaluna lenali kumu kehelinogo batiheliphihe luto, to lenali nani kumu ana hite kehelinogo batiheliphihe luto nokehelugo keta nonebesibe. To lenalitoga kenasabo bise'na to siko huse'na, to ibe fitobe nasana, to molomo titi hilata'na, to libe pigi bibe nasana, huli tali ka mege ka lulata, bona'i enug-ufa lelite tite, li sibi sibi hilata nasana yamofihu ni'inogo buto nehetito bu go lalube luto nokehel-ugo keta nonebesibe.

21 Lenalitogati luga'amagi ema afeha'aga komopatini kolo tago, moko lise'na to mokolo'namu enegekesa yigi yigi hi'ahana'a ya suhi ma suhi huto komopatini li gelehe mehise ya suhi hite nehinogo lenalitoga buto nehetiluna yamofihu lenogobisalo Hu'ma'niuba nele'mo laba hilenogo lenali foipanatinini'mu nipa'nigu ekesa ho lalibe luto nokehelito keta nonebesigo ya hulata no-

hube.

13

Lipoti molo epoloto koyo epi'ehina

¹ Ya'ma lenalitoga aku'i binogo kana'a loebe monebe hilina'mu yabe. Mono bukugu kaga ma luto ni'ina: *Ka foya lilana kanagu bo moneuba foipana hulenogo bo loebefi loebe monebefi bu gelete lu huto hilenogo lama'naka litemo ni'ibe.* Lenalitoga bu nehetilenogo ana kaga'a keheliloto ka'a lilube'mu hube.

² Afeha'aga ema foipanatini hiti mine'ahana'a to luga'a lenali hiti lalitoga alihia kana buna yupaahi lipoti lepito lu'ohunamo ananamofiji nuguufa'a foto'i nohuto aku'i ya'ma nolube. Alihi aku'i buto lenubuto mebiluna'mu yabe.

³ Kilisitou ya'ma kaga lu nimigo lulata nohunamofiji hapa'amu lenali sa sa nehana ya'ma bu go fe lilabe luto Kilisitou ai'a lenalitoga foya lilata nohina yamofiji agoya'a hiti meni'igo folagahatinigu amuya'a hiti lilata nohibe.

⁴ Koyapa'i lama'naka luto ai legeso huto nohigo malipu yafalo he'ahanamo ni'ibe. Yatai ya'ma afo'afifi Hu'mamofiji amuya'a lito ho tito minomo buto nohibe. Lali ana huto ai hu'ehina suhi huto legeso huto nohutaya aitoga i hepiloto Hu'mamofiji amuyalo buto lifita ito minolata nohuta yamofiji hapa'a lenalitoga li huto hu lepiluna'mu yabe.

⁵ Lenali ya'ma lama'na ka mono kagu nehafi menehafi komopatinimofiji fi taga hi etete bu geletetini yamofiji hapa'a lu huto hilo. To Yesu Kilisitohi ya'ma komopatinigu le'mo malago

nominanamofiji hapa'a akeheli'ahafi ya? To komopatinigu menominogomo lenali ka'a keheli fetaga hi'ahafi, kehelilo.

⁶ To nani ya'ma ka'a keheli fetaga hu'ohuna'a meni'ibe. Ya suhi hite bu nagalabe luto fifa ilata nohube.

⁷ Hu'mau keheli'ehinogo foipanatini li huto mehilabe luto nani Hu'mamofitoga loka hoto nominobe. Lenali bu negenogo mono bo lamana'a lolo huto minalube luto meni'ibe. Lenali Hu'mamofiji ka keheliya ilana yanauba huto hu lamana hilibe luto lulata nohube. To nani fa'mene bo mono kalugu minaluta'a ya bati hibe. To nugufauba mono bo nohuna lolo hilinamofiji fa'menena ni'ibe.

⁸ Lali ya'ma'amagita hena hena huto ka lamana'amofiji luba li emilune? Fa'mene fi hetofa hu etalune luto amuya moloto legeya'a huto hilina'mu nominone.

⁹ Lali bona'magihi enubulo amuyati'mu sa sa nohutogo lenali mono kagu amuyatini hiti minalana ya'ma lipagu lagati lebesilina'mu yabe bati hilune'mu hune. Ya nehinogo komopatinigu fi fana talibe luto Hu'mamofitoga kaga luto nohune.

¹⁰ Nani lenalitoga buto keke'i luse'na lepi lalube luto fato'i nohuto lipoti kaga lu huto huto fayahi ya'ma koyoto nolepube. Sipi Bousba amuya nimi'ehina nasanaloti lenali'i lenefelu haluna'a meni'ibe. Lenali lenufusatini le'mo amuya malalibe luto lu nimi'ehinamo ni'ibe.

¹¹ To nalalu'nimagita, kaga lu su hoto ma luto lilube. Lenali lenipagu keheli bati hite minalo. To lipoti lu lepito kaga ya'ma noluna kehelite

komopatini le'mo hetofa hite le'mo lamana hilanagihe. Ya nehite lenalitini komopatini le'mo moneko hilet fulunagu minalo. Ya hilenogo Hu'mamofiji mehi lepise'na to fulunamofiji afo'afu lenalitoga minalina'mu yabe.

¹² Lenali ai be tinogo ai be tinogo hite minete, ai soso hu etenogo ai soso hu etenogo hite koguna ite minalo. To Hu'mamofiji bona'i malo nehana asaga'magi keketini li lepelelata nehabe.

¹³⁻¹⁴ Sipi Bo Yesu Kilisito lehe'mose'na yauba to Hu'mau mehi limilata nohina yanauba Hu'mamofiji Sikalafu'uba lenele'mo hepilata nohina'a yanauba lenalitoga mino lito buto mineno.

**Ka Lamana'a Mono'i Lu Mu Tifi'ehina Ka
Yabe**
**The New Testament in the Benabena Language of
Papua New Guinea**
Nupela Testamen long tokples Benabena

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

PDF generated using Haiola and XeLaTeX on 18 Apr 2025 from source files dated 31 Aug 2023

429cb299-5ab9-51c4-8857-9de5c72f8388